

# «A nus mancan er ils skiunzs indigens»

Grischun Pendericulas: Radunanza generala

DA GION NUTEGN STGIER / ANR

■ **Per che las pendericulas da noss chantun possian vinavant prosperar e cunzunt sa sviluppar dovran ils manaschis bunas cundiziuns da basa, damain prescripziuns e cunzunt er dapli chapientscha da la politica. In tema è lura er stà il ferm franc svizzer.** Per salvar la radunanza generala 2015 han Grischun Pendericulas tshernì Curvalda nua che Lai Pendericulas SA han construi in nov portal d'entrada cun ina telecabina moderna. L'interess per la 65avla radunanza è stà grond, eran preschents represchents da tut las 50 societads da pendericulas che nus avain en noss chantun. La branscha da pendericulas è en il Grischun ina da las pli impurtantans dal turissem e da l'economia. L'enviern occupan las pendericulas tuttina 4000 persunas e la stad è quai anc adina 1300 persunas. Il davos onn per exempel han las pendericulas grischunas er fatg investiziuns per bunamain 100 milliuns francs e quai malgrà la stagiun d'enviern 2014/15 plitost mediocra. La svieuta totala da l'onn passà da las pendericulas grischunas giascha tar ina summa da radund 380 milliuns francs e da quels han ils manaschis fatg sulet 233 milliuns cun il retgav da traffic.

## Damain taglias

Las sfidas per la branscha da pendericulas sajan dapi onns las medemas, ha ditg *Silvio Schmid*. En cumparaziun cun ils pretschs tar las pendericulas en l'Austria, en Frantscha ed er en l'Italia èn noss pretschs per pauc pli auts. Ils custs dentant, quels sajan lur en il Grischun considerablamain pli auts, ha accentuà il Sursilvan. Cun il ferm franc svizzer e cun l'euro bass sajan las pendericulas en il Grischun èn in culp vegnidas per 20% pli charas e perquai pretenda el in curs minimal dal ferm franc svizzer envers l'euro. Subvenziuns dal stadi, quai dovra la branscha da pendericulas betg, dentant meglras cundiziuns da basa cun reducir las impostas e da liberar la branscha da la taglia sin carburant. Er quai che pertutga las regulaziuns da l'ambient, sco per exempel il schurmetg da las cuntradas da pali, quai sajan per ils manschis da pen-



Pretenda meglras cundiziuns da basa per la branscha da pendericulas: Silvio Schmid, il president da Grischun Pendericulas.

FOTO G. N. STGIER

dicularas vairas sfidas, ha menziunà Silvio Schmid.

## «Nus avain fatg noss pensum»

«I portia pauc che las pendericulas survegian dad ina vart contribuziuns e subvenziuns e da l'autra vart hajan ellas da dar or summas immensas per ademplir las grondas prescripziuns e per part ordinaziuns nunpussavlas», punctuescha il president da Grischun Pendericulas. «Nus avain fatg noss pensum», ha ditg Silvio Schmid ed ussa saja la politica er dumandada. Cusseglier guvernativ *Jon Domenic Parolini* ha ditg che la regenza grischuna sustegnja la branscha da pendericulas cun sur-

ponderar ubain adattar intginas ordinaziuns. Ultra da quai vegnia ella er a s'engaschar a favur da las pendericulas e dal turissem concernent la revisiun sa la revisiun d'ordinaziun davart la cuntrada da pali

## Speranza sin ils giasts svizzers

Ils pretschs per ir cun skis en noss chantun correspundan a la prestaziun e cunzunt er a la qualitad, ha ditg Silvio Schmid. Per la stagiun che stat avant porta sa mussa il president da las pendericulas grischunas optimistic. El ha gronda speranza sin ils giasts svizzers, che quels vegnian en il Grischun, renunzian dad ir cun skis a l'exteriur e chel

quels sa mussian solidarics envers il turissem svizzer che saja en ina crisa. «A nus mancan er ils skiunzs indigens e quai gia intgins onns», ha menziunà il Sursilvan. La situaziun politica sin l'entir mund saja eventualmain er in dischavantatg, dentant saja pussaivel che blers da l'exteriur vegnian er en Svizra cun esser tar nus la segirtad garantida.

L'onn da gestiun serra Grischun Pendericulas tar entradas e sortidas da 523000 francs cun in pitschen gudogn. Reelegids sco commembers da la suprastanza da Grischun Pendericulas èn vegnids *Andrea Camastral*, *Spleia*, *Markus Good*, *Tavau* e *Martin Hug*, *Flem*.